

四庫全書

集部

欽定四庫全書

集部

東里續集卷三十五

詳校官檢討

臣羅國俊

中書臣劉源溥覆勘

總校官進士

臣楊懋珩

校對官庶吉士

臣毛鳳儀

校對官中書

臣范鰲

騰錄監生

臣索英

騰錄舉人

臣朱錫彤

欽定四庫全書

東里續集卷三十四

明 楊士奇 撰

墓誌銘

錢秉淵墓誌銘

洪武二十一年八月初三日吉水錢秉淵卒既葬廬陵  
淳化鄉南路之坪之原後三十有三年其子某以從兄  
翰林檢討習禮所述事狀介習禮求文銘碣錢家吉水  
文昌鄉世以詩禮為鄉之望其祖以和父立明母張氏

秉淵諱某性孝友未冠遭元季之亂喪其父已卓卓有  
立奉母及弟妹避兵走傍縣屬歲饑口衆母旦夕為憂  
即跪進曰兒在大人何憂也旦夕竭力營措一家衣食  
無不足而恒有愉色和氣以樂其母事母終其身盡敬  
愛念不獲事其父語及輒悲切愛其弟延師教之一切  
公私事悉自任不以及弟妹而長育婚嫁之皆盡恩意  
惇宗族為人莊重寡言雖盛暑見弟姪必冠衣樂振施  
喜賓客過使行旅皆館穀如歸春秋四十有七娶張氏

有婦道子男三昭暉暄女一嫁王三益孫男十女一銘  
曰

有碩其宗儒其世維克承之孝與弟懷而未施待來裔  
楊處士墓誌銘

永樂壬寅七月四日延津楊處士卒其子盛以兵科給  
事中李本所狀處士家世事行請銘前吾在翰林盛為  
庶吉士有游從之雅故為按狀叙而銘之楊之先出弘  
農世有閥閱元至元中諱某者知保安州卒於官遂家

馬傳其生得譽皆隱居不仕得譽生忠又徙易之涑水處士父也洪武中為河南延津湖廣邵陽兩縣主簿皆以惠政得民心既卒處士奉喪歸道過延津延津人慨然念曰是吾仁父母也生而撫我沒而遂去我乎相與輓留葬延津處士不能止葬已因留家焉處士諱堃琳字某為人質素事親盡敬愛親歿哀毀而喪祭不違禮先墓在涑水歲未嘗曠祭掃居常孳孳以紹先業為心其教子亦必舉先世之盛曰勉圖無忝也躬儉以起家

泊然布衣無慕外之意與人交惇信義遇窮乏必賙之  
假貸不能償者折券不復問雖其自奉薄邂逅嘉賓客  
必傾倒懽洽廼已盛官京師數往視之父子相聚甚樂  
盛或以客外所養不備私自歎處士察知之語之曰崔  
玄暉母達於道吾乃不達耶但汝能盡忠事君上即汝  
之孝何必口體之奉哉將歸又語之曰吾之數來蓋自  
念老矣恐一旦死不復見汝今歸死固無恨汝但盡心  
國事毋徒以老身故惓惓也蓋歸幾兩月而卒享年六

十有二既卒自其邑長貳及鄉閭耆耄咸悲傷悼惜往  
致吊祭之禮焉初娶鄭氏生女二人繼馬氏生三男二  
女男長即盛永樂戊戌進士翰林庶吉士今為中書舍  
人次敏次惠女長嫁高嵩次嫁王某其二人尚幼孫男  
二易詩女二葬以永樂某年月日墓在其山先塋之次銘曰  
存之良履之臧銘其藏永其揚揚

故翰林庶吉士王欽正墓誌銘

正統元年三月上臨軒策士士奇與今少保江陵楊公



皆讀卷官上親擢周旋等三名第一甲第四名王鑑第  
二甲之首既退楊公為余言鑑所對策其篇末之獻磊  
落精切識高而義正才廣而詞暢將來有為之士也余  
深然之旋三人既受官有旨命大臣選進士如永樂甲  
申故事進學于翰林得十有四人而鑑居首悉以為庶  
吉士鑑等仰體德意咸克自奮時重風憲之選命廷臣  
舉監察御史楊公與余皆意在鑑屬有令不得舉初仕  
者然吾兩人所期望鑑遠且大非止御史也一旦余聞

其病亟屬所厚者為求醫藥不數日竟卒為之傷悼不已又屬所厚者為董治喪歛且許銘其葬於是其友給事中劉益述家世事行來趣銘王氏吉水金塘里故家世脩仁厚曾祖所安祖子完父嘉靖襲尚詩禮不慕仕進母某氏鑑字欽正自少端正秀穎篤孝友之行而嗜問學不煩督勵朝夕自進其功宣德壬子以書經選江西鄉貢第一明年會試禮部中副榜當授教官宣廟意有遺才在副榜命廷臣即文淵閣覆試之得二十有四

人賜冠帶給校官祿令進學國子監而鑑預焉後三年  
鑑中會試廷試賜進士出身入翰林為庶吉士為人簡  
靜端潔溫恭坦夷論事悉中理所蹈必由於義其中泊  
然居京師數年未嘗一濡足勢要之門公退閉戶閱書  
以求古人之心間為詩文自適所與往還皆詩書行義  
之士其將易簀也獨以親老不獲終養自慟蓋考其志  
與行宜祿宜壽宜顯用豈謂遽止於斯乎故其卒也眾  
皆悼惜之既卒家具蕭然斂以故時布衣亦足觀其平

素矣卒於正統三年六月十三日享年三十有六娶周氏左庶子崇述之兄子子男三琮珙珣女二皆幼嗚呼後進之士如欽正其可多得乎銘曰

材也見收於垂股驥也遽仆於天閑嗚呼欽正匪命之然歟奉天翊衛宣力武臣特進榮祿大夫柱國彭城伯張公墓誌銘

彭城伯張公薨于位公卿大夫咸往吊之其弟都督公求余為葬銘余諾之遂命彭城公之子某以事狀來拜

按狀張故歸德永城名家其先積善累仁世有紹續迨其高曾克而益弘高祖諱文銘妣宋氏曾祖諱景惠妣劉氏祖諱從義妣朱氏考諱麒洪武中仕至昭勇將軍指揮使永樂辛卯追封奉國翊運保義武臣特進榮祿大夫柱國彭城伯謚恭靖甲辰仍追封三代考妣皆進彭城侯及侯夫人恭靖為人敦厚閭閻輿務義施德秉忠事上始終一心母仝氏累封彭城侯夫人恭儉慈仁言動率禮內德之懿化成於家今太皇太后母也恭靖子

男女皆三公為冢子諱杲儀狀豐偉篤實和易表裏不二既冠時仁廟為世子公奉命宿衛文廟北平之師出公仗劍以從東取大寧還戰鄭村埧連大捷以功超授義勇中衛指揮同知遂援薊州敗遼東軍之攻薊州者追奔至榆口而還自是侍衛守北京南軍圍城公旦暮效力其間永樂二年以功陞本衛指揮使三年調金吾右衛五年調錦衣衛十四年調府軍右衛二十二年陞中軍都督府左都督是歲冬命為奉天翊衛宣力武臣

特進榮祿大夫柱國彭城伯食祿一千五百石子孫世襲明年侍衛宣廟謁孝陵歸奉命總督操練左哨軍馬正統元年患痺疾上遣太醫院官督醫視療竟以不起三年六月二日也春秋六十有五公平居孝於父母友愛諸弟祇事四聖小心恭恪以勲以戚爵位累加禮遇之隆錫賚之厚執謙秉和居靜守約循禮奉法深戒滿盈家庭中外以清以肅故其薨也訃聞特遣中官監視喪事命禮部賜祭工部賜賻營葬葬以薨之歲某月日

墓在某縣某鄉某原其配宋氏累封伯夫人子男八人  
長輔次輅府軍右衛指揮使先卒輓越府羣牧千戶軌  
越府典寶軾襄府羣牧千戶轍輶轅女二人孫男女各  
三人自古外戚有賢有否賢者克保貴富延被子孫否  
則不旋踵而傾覆隨之固在上者失馭之道也我國  
家自洪武永樂以來於厚戚里親之以恩約之以禮如  
張公者既藉累世之德善又身脩恭儉之行斯其家之  
興所以愈久而愈盛者歟銘曰



皇明建極賢戚多有堂堂張氏任姒所自本其先代累  
仁毓祉如石韞玉光華韡韡逮于恭靖彭城啟封源厚  
流閔用傳暨公維公嗣興秉孝與忠翼翼孜孜罔懈于  
躬始以戚來繼以武侍義旗所嚮身先將士曰戰與守  
厥績咸勵嘉誠疇勞峙乃爵位祇事四聖茂恩龐洪惟  
滿之戒惟謙之崇秉乃虔恭一于初終用永保家匪直  
令躬昔在東京次伯敬平暨宋肇興杜有審瓊吁嗟張  
公允侔令稱凡厥子孫視茲刻銘

國子司業吳先生墓誌銘

太學為國家成賢育材為興治之本所係非細故其師  
範尤在得人而非道明德立心古人之心知本末之務  
多士所心敬誠服者不足以稱任數十年來稱斯任者  
臨川吳先生其卓乎表表者歟先生以明正之學惇實  
之文端厚之行峻潔之操挺然而不詘皜然而不滓其  
於施教必先正本而後循序以達也蓋先生自讀書鄉  
校已立志不凡近雖寔夙夜勤苦淬礪不奪於外物洪

武中選鄉貢病不果上後入充太學生祭酒司業禮之不與諸生等奉命宣諭武臣雲南又閱軍士福建時奉旨出使者所至皆有金幣之贈重朝命也先生一毫無所受及歸其裝不益絲毫惟經過山川所作吊古賞勝之詩百數十篇耳會試禮部擢第一廷試第四賜進士出身授翰林院編脩陞脩撰考禮部會試纂脩高皇帝實錄書奏賜白金文綺及金織衣脩永樂大典為副總裁吏部言國子監闕司業太宗皇帝曰此非可輕授其

令祭酒胡儼慎舉有學行可為師表者以聞胡公舉先生即日授國子司業居無何祭酒有他命自是皆先生總監事時士習日下學者急於進取率不究心經傳惟誦習前輩程文以覲傲倖先生革之終日危坐堂上召與講析義理且設疑詰之使退求諸心庶有自得之益於為文必先義理而後辭采學者始趨實功不事苟得以禮法率其屬屬官中有不檢者數輩不便之相與求先生之短以沮之卒無所得又飾詐以謗之然先生素

行乎於外者久謗卒不行有以告者先生但自引咎而  
已以是名益高而謗者益不容於清議雖弘度待物然  
未嘗屈已求合雖時權貴卒不樂之而自信益篤仁宗  
皇帝知之有素一日顧士奇曰朕即位以來兩京之臣  
多以序進惟南京吳司業未進蓋朕久不見之故忘之  
耳後三日宮車上賓矣先生為司業十有八年太學生  
數千人及天下賢士君子皆稱吳先生古道吳先生賢  
師而職銓衡者獨若不聞此雖先生之命而益以見其

所守且士大夫之重輕於世者亦豈係乎其官之進否也哉先生篤孝行親喪哀毀骨立後在太學遇諸生告歸省者輒感動不勝處交友必輔之正道雖迂不避中允李貫故同舍生素相厚貫坐累繫獄十年家甚貧先生極力賙之且戒其家人有無相共貫竟死獄中而賙其家益勤平素施義類此一日會宴太學得風疾遽革舁歸顧其子曰吾死勿用浮屠老子法治喪不一語及他事而卒卒之日家無一緡之儲禮部尚書蔚公集衆

賻治歛歸葬先生諱溥字德潤號古崖吳氏世業儒其  
先居臨川之種湖曾大父景南大父某父思清贅崇仁  
章氏遂家崇仁後以先生貴贈其父承德郎國子司業  
母章氏安人及封其妻鄭氏安人子男四與弼與疇與  
年與性皆克繼承女二長嫁應天府學教授孫曰讓次  
嫁徐士英孫男三先生卒於宣德丙午九月三日春秋  
六十有四以卒之明年某月日葬崇仁左橋之原先生  
長士奇二年同官翰林者七年又以同鄉相交莫逆後

來北京嘗主余家間共夜坐談其貧賤時事蓋使人聳然起敬畏而後知其操執峭厲蓋天性云無幾聞其訃余為儒林慟之嘗私為作傳矣欲書一通寄其子未暇也今與性新除休寧縣學訓導在北京求余作父墓銘遂損益傳文為之誌而係以銘曰

嗚呼先生君子之儒古道之趨古人之徒其存者貞其執者確必有本源用淑來學豈世無人誰歟古心嗚呼先生足彊儒林嗚呼先生逝矣不作寒崖古栢高風凜若



周貞外墓誌銘

兵部職方員外郎吉水周君致仕之四年卒於家其子翰林侍讀叙以侍講劉球所述事狀求葬銘余素交游其父子間雖老且病不得辭按周氏吉水泥田名家業儒代有顯者宋之季諱應龍號盤洲為時碩儒其子諱京孫直寶謨閣上疏力詆賈似道奸邪不去之必誤國不報棄官歸君高祖也曾祖諱厚教授里中不仕祖諱聞孫元至正中鄉貢進士為鰲溪貞文書院山長召脩

遼金宋三史上書請以正統歸宋時不能用遂去之考  
諱觀妣李氏宣德中以君貴贈其考奉直大夫兵部職  
方貢外郎妣宜人君諱鳴字岐鳳天資穎敏自少喜學  
問長而明經博究子史家故豐於產更兵亂產墮有司  
仍稽故籍徵徭賦君時成童卓然躬任之事靡不集而  
產日復家日裕既冠桐城縣辟儒學訓導正師道嚴教  
法諸生多有成丁父喪去服闋上書論事擢山東即墨  
縣主簿以明敏詳慎為上官所重布政司檄君隨御史

按察司官詣登州省錄重獄七十三人辭不服者四十  
五人御史按察司官皆不聽君委曲言之且援古之以  
伸雪冤獄知名者導之卒從君言共覈之四十五人皆  
得直時方用兵賦即墨兵器鐵十七萬君以海濱非所  
產奏罷之又奏便民十數事皆從之在邑得其民心永  
樂甲申改國子學正車駕視太學預賜宴及襲衣吏部  
言漢府闕紀善命選國子監官任之祭酒胡公若思舉  
君遂用之既至王府事有不當者悉直言高瞻雖貌禮

之中實忌之然君遇其有過必諫不憚忤也時府中匿  
不傳籍軍三千人又縱護衛軍據各衛牧地及邀奪商  
民財物人苦之莫敢訴告君具言於高煦且曰不早戢  
之事必上聞而國危矣不聽高煦作寶賢堂君獻箴致  
規諷之意冀有啟寤高煦益厭之會車駕北巡仁廟監  
國時高煦亦留南京恃寵驕恣所為益多不法君懇禍  
及入極言之遂大見忤誣其罪於仁廟下君錦衣衛獄  
君從獄中陳訴且錄所嘗進諫書上之仁廟寤即釋君

出為長洲縣學教諭振起學政日見成效賓興之歲諸  
藩聘考試官考福建者二考浙江者一率稱得人長洲  
九載陞南京國子博士初至入見仁廟於文華殿猶以  
紀善時事俯垂勞問在監再歲丁繼母憂去服闋用薦  
陞南京兵部職方清吏司員外郎授奉訓大夫時清理  
軍伍職務叢脞君從容綜理而無滯事三載考最賜誥  
進奉直大夫推恩考妣宣德十年以老疾陳乞致仕從  
之正統三年四月五日卒春秋七十有五君致孝父母

撫二幼弟極友愛冠婚率盡禮合三從兄弟子姪百口同居爨一家之間咸無私蓄著家範十數條令子孫世守於子弟天資高者必教之學經好學者必極意獎進族人有沒於仕貧不能歸喪者必經營歸之能憫窮濟阨清江艾時春之官寧海道遇寇刼傷創甚行橐且盡君邂逅為求醫藥愈之而分資予之而別於急義類此君有材具善持論議為詩文詞采煥發波瀾層出而舉筆立就所著有尚書通春秋纂要及退齋稿若干卷退

齋者其所居之號也元配彭氏贈宜人繼王氏封宜人  
子男三長勉次序永樂戊子進士自翰林庶吉士累陞  
侍讀次廣女二前兵科給事中金昭伯廬州儒學訓導  
彭塤其壻也孫男七女三曾孫男女皆二其葬以卒之  
明年某月日銘曰

吉陽之周文獻宗代有特起推鉅公鑽研六籍觀會通或  
揚于庭挺臣忠或潜在下善厥躬亦有著作開瞶矇緊君  
嗣興承時雍贊理小邑寧瘵痼陟輔親藩竭乃衷弼違糾

隱聲泯泯杳鑿齟齬詎有功暫詘適信道靡窮偃衣橫經  
坐黌宮中臺郎秩遷益崇名遂身退何從容逍遙林泉壽  
考終山盤川回馬鬣封子孫蟄蟄來章逢春秋霜露展敬恭

光祿寺卿郝君墓誌銘

光祿寺卿郝君諱郁字文盛世家永平之撫寧大父諱  
某大母白氏父諱某母程氏文盛自幼父知其必貴稍  
長俾學甫冠有司擇主案牘永樂元年內難肅清之後  
論守城功授文盛陝西咸寧縣丞未行改北京光祿寺



典簿授從仕郎持躬勤慎釐務周悉秉謙用和厥譽以  
起陞本寺丞授承務郎益克祇勵時并泉為光祿卿恣  
無忌畏罔上侮下至於儲君亦肆讒間文盛盡力彌縫  
靡有遺闕泉既以罪黜遂超陞光祿卿授亞中大夫賜  
誥嘉獎贈其大父父皆亞中大夫光祿寺卿大母母皆  
淑人封其妻聶氏淑人郝君感恩愈篤弗懈凡祭祀供  
御宴會之事必親必誠間有疾靡敢遑暇強起趨公不  
俟勿藥蓋恭事四朝始終一心待遇之厚有加無損正

統二年二月初五日以疾卒訃聞賜祭命有司營葬朝  
自傳保尚書以下咸吊祭文盛為人質直坦易無城府  
居家事親孝撫其從弟勝貴壽盡友愛居官處僚屬和  
馭下寬平其卒也衆咸悼惜之向使文盛當井泉無狀  
時稍分毫混蹟或不周於謹豈復有後來隆遇文盛享  
年六十有一而官光祿者三十有四年可謂榮矣亦其  
發諸已者有以致之歟其子男二人長忠次信孫女一  
葬以卒之歲三月廿一日墓在北京宛平縣之玉河鄉

於是忠信介珍羞署丞王彥材來求銘余與文盛同朝  
久目睹其行事為叙而銘之銘曰

克恭於上克寬於下惟天於人恒與善者仕垂三紀位躋九卿  
外峙顯榮中和且平壽而考終亦既多祉勒銘厥藏庶幾不死  
欽承祖業推誠奉義武臣特進榮祿大夫右柱  
國定國公徐墓誌銘

上天命聖人為天下主必生文武之賢為之輔佐用成  
大勲建大業若身都將相享富貴榮名令終傳被子孫

久而弗替又必本於盛德焉元之既衰寇盜充斥生民塗炭極矣我太祖高皇帝以至仁大聖躬膺天命仗一劍起淮右舉湯武吊伐之事有識之衆雲附景從義旗所之東征西怨不數年四方肅清天下歸戴遂造萬世太平之業於時股肱心膂之臣皆英武傑特超邁之才若純誠厚德顓顓焉尊主庇民之心者中山武寧王徐公其首也天監厥德報福彌厚延慶後人逾遠逾盛非一時同輩所可儼也蓋王四子長輝祖襲爵魏國公次

增壽當太宗皇帝師旅之際有翼戴功而竟死非命初  
追封武陽侯進定國公謚忠愍公其嫡嗣也時年十五  
召見賜名景昌遂命襲爵定國公授欽承祖業推誠奉  
義武臣特進榮祿大夫右柱國食祿二千五百石子孫  
世襲命吏部慎簡儒師道之學問公天資穎敏已嶷嶷  
負智識從師講授日謹程度其師豐城丁秀恒重厚雅  
則公惟其教之率未嘗或違而寒暑朝夕所以事師禮  
咸備踰年始趨朝叅上察其進退恭謹喜遂欲任以事

永樂四年命掌左軍都督府雖細務必親而智日廣明年汴河溢命公代祀河患以寧十三年車駕幸北京以公事入見顧問再三進對稱旨賜御廐馬三匹鈔六萬緡十七年脩鳳陽皇陵宮殿命公董之益竭祇勤撫綏獎勵人競勸功十八年侍仁宗皇帝入朝洪熙元年命掌行在後軍都督府是年丁母太夫人沐氏憂宣德初起復高煦構逆宣宗皇帝下詔親征命公等守北京師還賜賚良厚後車駕三出巡邊公皆扈從祀獄瀆及冊

封宗室皆秉虔將命先是仁宗皇帝篤念外家孜孜勉  
公兄弟子姪於學公祇體德意克力進脩朝退閉門手  
不釋卷遂多識古人言行之善與凡治亂興壞之由閒  
暇吟咏自適家居事親孝為人簡靜寡所交處惟名儒  
賢士過之必起趨迓相與傾寫極懽未嘗苟附權貴正  
統二年六月十二日以疾卒於正寢其生洪武戊辰六  
月十八日享年五十訃聞上命某官賜祭賜賻勅有司  
治葬將以卒之歲九月九日葬宛平縣京西鄉黃家臺

之原公上世及三代已具先塋之碑其配張氏封定國夫人其子男二長顯忠次顯義女一歸金吾衛指揮同知盧能於是顯忠奉國子助教謝濟所撰事狀介太醫院判蔣主善求余銘墓嗟夫公生佐命元勲之家遭逢列聖爵位崇而寵祿盛而心之所存躬之所蹈凡以嗣先烈垂後裔者其可無憾矣遂為銘曰

菽菽中山尚文敦武翼聖承運弘靖天下功存社稷德施生民配祀清廟衍祚後人維賢仲子忠愍克肖中遭非命



帝用允悼崇爵華褒寵光隆隆大國豐祿命公嗣封煌煌  
貂蟬加公卅角拜頻受命疑特恭恪篤念天寵亦篤孝思  
圖惟弗忝肆勵書詩前言往行心在躬蹈曰子操志敢昧  
忠孝承官惟祗蒞事惟勤雍容在廷有儀循循躬事四聖  
歲歷三紀鞠躬一節忘終猶始既父全歸壽豈必多夷  
考平素行罔缺瑕宛平西鄉卜藏斯吉焯示悠遠太史  
有述

周處士墓誌銘

吉水泥田里周氏有君子曰時立以正統二年六月十四日卒其子源奉翰林脩譔叙所述事狀求余著葬銘脩譔時立族弟也其述詳實然時立年十七八從其父公明先生於廬陵邑庠余數過見之愛其溫粹端厚而勤於學嘗戲公明曰此當跨竈公明亦戲謂余此竈殆未易跨已而私語余君非敢譽子然是子純而有志承家可望也時公明之叔仲方先生教郡庠亦數向余矜時立不凡無幾余被召仕京師往往逢人問時立知其

學與德皆進心以為公明喜蓋與時立別三十年再相見北京則蒼然老成人也相勞苦未竟遽別別數歲聞其卒為之悵然則余銘之也固宜周氏文獻鉅族其曾祖學顏祖孟泰皆博學不仕父文明歷廬陵黃岡長洲三縣學官母曹氏時立諱道時立其字生有令質自幼嗜學十餘歲能屬文日彊識數千言仲方先生授之書經遠有造詣里名家競延為塾賓教其子弟出則授徒歸則治其家秩秩有條理稍暇自致力於學不輟率間

歲一走數千里省父母於官事繼母藍得其懽心友愛諸弟甚厚弟迪為翰林脩撰在北京進為訓導在襄陽子源為教諭在湖州皆嘗一造觀其所設施而勵其所未至平居誘掖啟迪族姻子弟於善道不間戚疏從叔公智公顯坐累謫遠戍遺幼男女於家時立訓育之長而為之嫁娶於助建先祠割田供祭祀脩宗譜皆盡誠意素所交戴用礎闔家病疫里俗懼傳染無一跡及門時立獨旦暮躬視不懈戴妻卒教督臧獲為殮殯如禮

素志澹泊不干仕進居恒自檢其身而以義畏服其鄉  
人家有古桂復榮作重屋其側藏書甚富以教其子孫  
間日會賓友焚香鼓琴觴詠為適里有山溪之勝晚自  
號山溪其學博通經史諸子為文贍而正所著有山溪  
稿數十卷配毛氏繼楊氏子男四源由德清縣學教諭  
陞天台縣知縣沂潛澤皆治經術女二長適羅宗淵次  
未行孫男三女四葬以卒之歲某月日銘曰

奕奕周氏世儒厥服崇科清秩有嗣有續有特時立舍

章韜華大義之明厥履孔嘉秉誠孝友劬劬自孤石泉  
雲林優游恬愉豈乏世儒高視宏議孰為時立俯仰弗  
愧嗟嗟時立時豈多有作銘昭之永式爾後

越府右長史宋君合葬墓誌銘

宋之先自廣平徙江西之新淦又自新淦徙吉水至榮  
甫又徙廬陵積財能施及其子彬之孫成章皆隱處不  
仕成章生若璟翹楚倫輩中與大學士解公游公屢稱  
之其卒也為之銘墓娶孫氏金壁里名家幾子其弟幾

子子環字文瑩自幼淳厚秀穎喜學問從明經師日勤不懈舉中永樂三年第二甲進士為翰林庶吉士與脩永樂大典書成被賜賚擢吏部驗封主事授承直郎居職勤慎歲餘從隆平侯董修太岳太和山宮觀能周悉人情而矜恤其力竣事陞吏部考功郎中授奉議大夫屬建北京又從侍郎師達采宮殿材於湖廣以寬厚贊達衆咸悅之仁宗臨御封建諸子簡用輔道擢梁府右長史授奉政大夫賜誥命又以其散官職事贈其父而

封其母太宜人妻宜人為長史踰年小心恭恪王敬禮之丁內艱去賻贈之甚厚居喪杜門不出服闋改越府右長史凡持已處事如在梁府一府賢之宣德八年六月八日以疾卒享年五十有二其孝悌之行一出天性處朋友鄉黨惇信義為人和厚夷坦犯未嘗校自守有素再以使命過鄉里無少長疏戚接之懽然見郡縣長吏叙寒暄而已未嘗片語及私故尤為鄉先輩所重居兩京不苟涉跡權貴人之門間暇恒與文士知己觴酒



賦詩其襟宇灑落於利泊然所著詩文有詞林稿南行  
稿梁園稿妻宜人同里劉氏父貴高母關氏生一歲而  
父喪其母教育之精女紅涉知書年十六歸宋氏孝事  
舅姑舅姑沒不衰謹於婦道躬儉勤以治家尤篤意教  
子學問父沒母老無子迎養終其身先是其母卒於北  
京之官舍未歸殯踰年宜人亦卒其卒先夫卒之十日  
實五月廿八日云享年如其夫子男三忻懷恂皆志於  
學懷宣德八年第三甲進士女三孟歸劉體元仲歸龐

彥珙季尚幼孫男二光祖奎應女三文瑩之卒也家具  
蕭然無以為歸計於是懷言其情於朝特給舟併歸其  
三喪同鄉學士大夫官京師者集賻助之諸子將歸合  
葬其父母給事中康振於宋氏姻家述其事行為狀余  
故識若璟而相與文瑩三十年為刪而約之為銘授其  
子俾刻而納諸墓銘曰

嗚呼文瑩明經發身金馬石渠聲光蚤振簡屬天官克  
毖克勤再相興作亦克用仁察行與能進藩輔臣樂易

之容靜貞之存不競不綌有執有循嗚呼文瑩其君子  
人曷不百齡遽返九原厥有德婉合藏于墳銘以昭之  
示其仍雲

東里續集卷三十四

欽定四庫全書

東里續集卷三十五

明 楊士奇 撰

墓誌銘

兵科給事中胡端禎墓誌銘

數年來吾郡吉水舉進士升者胡端禎王欽正皆溫厚  
謹靜言動循禮余心重之皆期遠且大也上屢勅廷臣  
舉賢才余未嘗不意在兩人屬例不應而止未幾兩人  
者皆以病卒余皆悲悼久之蓋悲夫賢者之難得而易



喪也欽正卒於北京其喪之歸也予為之志墓端禎以  
病歸卒於途故未及也今年其學者餘杭丞貴溪丘熙  
岳具禮幣以英山教諭徐鼎所具事狀求余著葬銘按  
狀胡邑東故家蓋宋剛簡公夢昱之後曾祖朴祖義賢  
父希亮始徙邑仁壽鄉之南華母金塘里王氏端禎諱  
祥以字行天資淳實自少喜學問從明師治經術以易  
經舉登宣德五年進士第既第而歸從學者日衆有千  
數百里負篋至者八年被召至偕至者六十餘人上親

命題合試之文淵閣下拔其尤得七人端禎與焉改翰林庶吉士明年擢戶科給事中無幾得疾歷數醫弗效已而小瘥請於朝乞歸治從之歸過南京疾復作竟卒和州西梁山下其妻之弟羅昭問以其櫬歸其家葬之黃岡坑之原端禎為人學廣識明言簡志正舉錯當義不苟止隨內篤孝弟之行外崇友朋之信和厚平直博愛有容蓋以施無往不可惜乎其遂止於斯也享年三十有八平生所為詩文藏於家娶羅氏惟女子二人長

許嫁王某次尚幼身後之祀尤可歎也若熙岳之惓惓圖不泯其師亦足以敦薄夫而表端禎之明於取友也  
銘曰

德之茂而施弗究存之厚而遇厥後嗚呼端禎吾奚歸  
咎

故翰林庶吉士曾君墓誌銘

吾友曾君與賢自吾布衣時與之好後同在翰林五年往還意益厚其沒三十年矣墓未有銘余未嘗忘與賢



屢欲銘之輒牽於事或病不果今年蒙上恩歸展先墓  
其子調踵門拜曰先子之銘文企佇久矣迺按調所述  
世家序而銘之序曰曾之先居金陵唐末稱朴者生三  
子其季延構當五代之亂來徙泰和其後子孫之盛累  
累有科名十四世至如驥登宋淳祐十年第累官寶慶  
府通判兵亂死節贈敷文閣待制諡忠愍生昌端昌端  
生以立以立生子述皆儒業教授里中子述娶劉二子  
長與畊次與賢也與賢自幼淳厚端謹從學蕭尚仁先

生父子之門治書經邑大夫簡充學弟子員登永樂甲申進士第為翰林庶吉士預修永樂大典寅出酉歸恭勤職務時四方博聞宿學多在咸重與賢而期其遠且大也書未進以疾卒於官戊子歲三月十五日云享年四十有一京師薦紳大夫咸悼惜之與賢儀貌豐偉面潔白如玉氣宇溫裕坦夷家居篤孝友之行初雖出為贅壻飲食衣服所以佐其兄奉養皆備已而還侍下朝夕益盡愛敬及仕得祿一味之甘必先寓奉親然後及

己兄弟相親愛不間如一體處朋友以誠有急必赴同  
學湯如川既仕同年同官且居同舍有無共之無彼此  
之異如川病極力扶持調護及卒與其弟協力經營歸  
其喪及其孥而悲傷憂鬱久不衰隣有數犯之不校與  
賢有愷悌慈惠之德使之為政必有以及人惜乎未見  
諸用也其配蕭側室劉相親愛如同產姊妹至于今益  
篤世蓋絕無而僅有又可以觀與賢德之刑於家者矣  
子男二誦京女四皆有歸其仲之壻龍槃今為禮部祠

祭主事孫男五鑑翰海鉉鑰其葬在龍池之原銘曰

允矣君子其德令嘉未究于施匪命則那粵昔德人善  
應多有有不予躬必于厥後龍池之濬勒銘其藏振振  
子孫來將有徵

伊允德墓誌銘

翰林庶吉士伊侃既奉命觀政禮部聞其父喪將歸纓  
經齋翰林編修徐理所具事狀謁余求葬銘其父諱宗  
肇字允德伊之先家海州沐陽宋南渡始徙蘇之吳縣

自始徙至允德九世矣曾祖諱元裕祖諱嗣賢考諱服  
皆隱居不仕妣朱氏父母二子長宗啓次允德也允德  
自少喜讀書多識典故有咨之能悉舉本末前輩文章  
之雋永者亦多所推讓蚤喪父事母與兄以孝友稱弱  
冠兄坐累闔家徙鳳陽之定遠久乃獨奉母還母沒葬  
祭如禮兄尚留定遠歲時厚資給之一味之甘必致兄  
乃食平素所接率端士不肯苟近富貴人居鄉敬老尊  
賢恤貧窘急患難所交李克明者夫婦老且貧館穀之

終其身比卒皆為歛葬遇為不義者其可與語必婉辭  
導之改不然輒引避之所居隣府治未嘗一涉跡嘗寓  
南京夜雪有騎士葉英醉馳馬過其門墜仆卧雪上馬  
已逸允德掖徙葉卧門下葉醒失馬號叫急索門外人  
語葉允德徙若葉遂持允德索馬且欲訴官允德不得  
解勉酬之直既解葉歸馬已歸其家櫪上葉大感悔走  
詣允德拜內直謝曰公仁人活我我則負公願自今父  
事公終身幸公不我絕允德慰遣之但戒其繼此節飲

允德素不喜浮圖人有及門者一切卻之曰吾不能有  
益汝臨卒猶戒家人毋信用流俗言以異端汙我可謂  
不惑也已卒於正統己未八月二十五日享年七十元  
配毛繼袁及蔡皆先卒子男四訓亦先卒次任次侃正  
統丙辰進士次俊女二長亦先卒次嫁王澤孫男二女  
一諸子以卒之明年某月某日葬其邑查山先塋之次  
銘曰

善篤于家孚于鄉壽而全歸此其藏後有續承世其昌

陳德遜墓誌銘

陳之先見余所叙其譜牒德遜之曾大父碧潭大父觀  
定父彥和贈翰林侍講學士母曾氏繼母胡氏鍾氏曾  
及胡皆贈宜人德遜其名既冠遂以為字自童丱端重  
溫粹從余外兄陳孟省學在諸生中獨靜而專為老長  
所愛蚤喪母幾冠喪父能自卓立有孝友之行兩事繼  
母皆盡愛敬弟德遵喪父時始齔長育教訓之用意周  
悉凡於事不肯苟且惇義薄利而有恒心間巷愚劣徂



詐之徒旦起而夕仆者比比德遜獨謹守先人田廬終其身不銖寸虧益而坦然如履康莊蓋無所驚乎外也閒居手不釋卷作室數楹積書其中題曰靜脩非其人處雖縣長貳或其行弗臧而欲邀致德遜必以事辭所居近市而嘗入南山中講授自適德遵第一人進士及第累官至學士衆皆為德遜榮德遜泊然而愈執謙下且數寓書勵其弟敬慎聞弟疾甚匍匐走北京視之留數月疾已即歸德遵固留之歎曰吾老矣人世幾何

寧不懷兄弟同處哉所中心不忘者去鄉久諸兒或一  
背訓教將不可追改蓋其於教子尤切云既歸再歲而  
卒正統丙辰閏六月七日也享年六十娶羅氏子男四  
璵璣璧瓚女四皆有歸孫男若干德遜之卒也朝之傳  
保尚書學士以下聞德遵之賢兄歿皆致賻祭亦有為  
文章哀輓之者余昔與德遜同里閨其從父一敬於余  
交莫逆家居時屢從一敬過德遜愛德遜和厚愿慙言  
必在義今十數年來里故舊亡歿已盡每念幸獲歸休

可相與譚論者惟德遜而德遜北京臨別亦為余言當  
豫作草亭於鷗江之上以待先生嗚呼今則已矣德遵  
求余銘德遜之墓遂述余所望於德遜者為辭銘之曰  
蕭散兮容與懷思兮偕處子期余兮鷗之渚余行未旋  
兮子逝何所嗟余旋兮其誰與

張則善墓誌銘

秀水丞張僉謁選京師主吾家近喪其父處士君僉聞  
訃號慟擗踊不能勝予弔之既成服將歸自述事狀求

予誌墓張故西昌巨室田廬貲產鄉甲乙數元季之亂  
銷落奄盡里老長率能道其家盛時後生少年聞者皆  
歆動嗟歎不及目見于時張之子孫皆逢掖治詩書鄉  
稱善人如處士是已處士諱則善字嗣騫自少志不務  
外學通尚書嗜毛詩手錄口誦不倦成童父母皆喪辛  
勤涉艱苦卓立闢塾館教子及里中子弟廣田園以殖  
家媠戚隣比能急其急氣和色溫於物無忤無間愚良  
少長皆樂觀之正統五年正月某日卒春秋七十有四

元配彭里名家繼羅皆先卒子男二長坦選鄉貢入胄  
監甘貧力學其卒也大司成以下惜之次僉永樂辛丑  
進士擢四川道監察御史能持身勤職三載坐微累左  
遷秀水女三廖祥仲劉暉陳叔慶其壻也孫男六朴巽  
彖渙蒙觀曾孫男四處士及其二配皆葬里命華山之  
原某仕兩京不至鄉四十年與處士相聞未相識也去  
年奉命歸親過處士之廬時處士寢疾已久不遂一晤  
語以出頗用悵惘而竟以是病不起惜哉銘曰

恬澹幽貞避榮與名既壽全歸來嗣有興

贈文林郎四川道監察御史歐陽君改厝誌銘

監察御史歐陽洙既陞四川按察副使瀕行請於余曰  
先考之沒而葬也嘗有銘矣洙忝官於朝得賜勅推恩  
贈考文林郎四川道監察御史封母孺人洙又得吉卜  
改厝先考於某原改厝之銘願徼惠於執事歐陽氏蜀  
江里名家其先與宋文忠公同所自出入國朝階儒學  
登仕籍累累不乏歐陽氏於吾家相望半舍許吾少交

允堅允清而尤密者允賢於允俊允和廣拓廣湯廣洙  
皆相厚余嘗銘三峯先生及允賢之葬矣於洙之請宜  
無辭洙考諱正字允端幼孤卓然有立志不與羣童狎  
嬉辛勤植門戶敬事其母孝於奉先處宗戚鄉黨咸當  
其分而持身謹飭家距縣城甚邇非公事不輒至平居  
澹然日與族父兄弟宴聚相娛樂於禮接賢士大夫無  
厭倦意出言人率信服於教子最為要務宣德五年十  
一月十八日卒享年五十有五其曾祖覺先祖以吾父

子廉母某氏其娶某氏子男四長即洙永樂某年進士  
發身入風憲次洵次洛次汴孫男八璵琢琦珉珂其改  
厝以某年月日銘曰

維歐陽氏之宗毓慶垂祉學古入仕連續興起維允端  
甫德善有紀弗騫弗揚丘園樂只身沒名榮歸寧在此

李予懷墓誌銘

廬陵李予懷之子子潭幼喪母戴氏鞠於其舅遂冒戴  
姓既長明經為國子生中鄉貢選請于朝願復李姓以



求養其父命下而喪父之訃至矣子潭銜哀茹苦將奔  
喪而歸自為狀來乞文銘墓且曰不肖不孝生不能供  
吾親一日之養吾親沒又無以慰之於地下不孝益大  
矣幸必賜之銘辭弗獲按狀予懷諱衷其先出唐西平  
忠武王晟曾祖雲隱祖慶可父景琳母歐陽氏景琳三  
子予懷其季也自幼失怙事母兄能盡愛處族姻有義  
叔祖朋叔天麟天瑞皆官於貴播在夷獠之間鬱鬱乎  
羈旅無聊也君走數千里往省慰之既歸叔祖叔相繼

死皆有遺孤子不能歸且貧無以自活君又橐資走數千里往給之又撫之皆有立然後歸嘗贊同里戴庭芳氏庭芳早世撫其孤穉子如同產昆季卒大起其家然終不私一錢鄉鄰有急奔走赴助之未嘗以私廢平居尤以教子為務歲時闢塾館延明師禮意曲盡嘗語其子曰吾生長兵戈之際不得從事於學今且老矣若等幸生遭明時毋徒視我自棄也歲永樂乙酉二月某日以疾卒享年若干子二人長子泉次即子潭女二某某

其壻也孫男若干嗚呼若子懷可謂善人也已銘曰  
慤乎內不飾乎外樂乎義弗徇乎利弗融於世而止於  
是以昌其嗣

羅處士墓誌銘

廬陵羅處富既登進士第歷事秋官秋官卿上其能擢  
知隨州且行持鍾子溫所狀乃祖處士之行示余且言  
元大父沒幾二十年惟窀穸弗獲永固也家父將卜改  
葬焉而幽堂之銘未有所屬敬命不肖以請於執事余

交處富久而銘其祖之墓又出其父之命也則按狀叙而銘之處士諱思成字存中號天存世家廬陵業儒其先嘗以科第顯於宋曾祖某祖某父獨清福建儒學提舉與劉申齋劉桂隱齊名母尹氏處士質直溫厚尚端潔敦孝弟之行家四世同居爨愉愉然和也處士博學強記尤深於詩書少時屢聚試郡學皆出諸生上嘗挾所業謁歐陽楚文公虞文靖公皆愛重之一時名人如進士劉闡薩都刺皆與之交而尤與豫章辛敬襄城楊

士宏暨劉尚書崧厚善嘗一就試于有司不偶遂隱居  
不出務以善導人鄉閭悍暴化其德者多矣遇有急難  
趨赴之惟恐後皇明混一海宇數下詔求賢時年已六  
十餘不果上蒼顏鶴髮逍遙青林白石之間日引子若  
孫與其鄉人少俊講說聖賢道德之懿暇則登高臨清  
觴詠以為樂年八十一日具酒殽召親友告曰吾明  
日且與諸君別及期正襟危坐索紙筆賦詩翛然而沒  
時洪武戊辰四月十二也娶蕭氏先十九年卒子男三

人長于邦亦先卒次于京來求銘者次于同女一人適  
左子聲孫男女皆六人始葬于所居之後今將以某月  
日改葬吉水縣麻坑之原夫士挾一才一藝無不欲見  
用於世至其用之未必皆能有所自見也處士雖未用  
然平居所及若此孔子曰奚其為為政處士之謂乎銘  
曰  
其畜也富而不顯其遇其處也庠而弗過其施躋于耄  
期昌其本支天之報之其不在茲乎

鄉貢進士羅仲弁墓誌銘

吾邑羅孟昭之冢子曰璫以易經中永樂九年江西鄉試明年會試下第為國學生又明年冬得疾又明年其父走千里視之既見疾小間數月更劇遂不起其父哭之慟其所相知在京師者皆往弔之於是其父將以其喪歸葬西昌屬前溧陽縣學教諭梁本之述其世次行誼以屬余為銘余受而讀之曰嗚呼孟昭之愛其子與璫之克敬承其父之愛皆余所知而今已矣其可悲哉

方璩髫髻已俊爽異常兒是時蕭尚仁謝子方兩先生  
皆鄉郡之通儒孟昭延致蕭先生家塾以教璩蕭先生  
沒又延致其子靖江府長史用道用道出仕謝先生方  
分教郡庠則厚幣遣璩往從之歲時備事師之禮謝先  
生沒又禮致今廣西按察僉事陳公延教之而遇縉紳  
儒者之往來其家孟昭皆極意隆奉庶璩之益得師也  
愛璩如此璩亦勉勉敬承其父之愛夙夜飭勵自力於  
學不懈邑大夫舉充博士弟子員未幾選中鄉試其會



試京師也余時奉命主文衡蓋竊意璆衰然遂升也既  
拆名而璆不與余方內愧失士而璆數過余怡然益恭  
下無幾微不得之意余又竊歎璆之中有過人者其所  
就未可量也既入太學太學生時數千人祭酒胡公課  
試之得璆所作文大喜寘第一明日告余曰西昌後來  
之俊不乏也其所可望成立如此嗚呼豈謂一旦而遂  
已也是豈不可悲乎璆字仲弁一字崇弁事父母甚孝  
惟一弟篤愛之惓惓焉引之於道所得一錢以上皆歸

父母恣弟妹所取未嘗以入私室於族姻長者盡敬愛  
幼者皆有恩意凡所交游有急盡力赴之慮事精密雖  
微細必審而後動閒居手未嘗釋卷率嘗至夜分始罷  
在太學有暇輒來余家嘗謂余曰蘧伯玉至老不忘省  
己以此為君子又曰人卑卑不出閭巷以日親乎賢士  
君子惡能知其行之非哉嗚呼使璫而假之年所至可  
量乎惜哉母胡氏配陳氏皆名族子男一某始五歲璫  
卒以永樂十二年五月四日得年二十有七將以某年

某月日葬某鄉某原銘曰

梅溪之涯羅世所家遷邑城西源流之支既續而蕃益  
阜以殷礫也不羣纘栗秀文績粲翹英衆望其騫孰其  
遏之弗舉而捐命也柰何其藏在此史氏銘之庶其不  
死

蕭吾幼墓誌銘

洪武癸酉冬十二月泰和蕭吾幼卒權厝其居之西偏  
又七年之十月十五日子建平改葬于千秋鄉高富里

田北之原既葬屬余為銘按吾幼諱某祖明叔考志可  
皆有隱德母劉氏吾幼為人恂恂不譁事親誠至處族  
人兄弟周恩義與朋友恂恂人未嘗見其有艷容厲氣  
所資度可寒暑朝夕而足不求有餘有餘遇所識窮乏  
輟分之凡所為一出乎天資庶幾古所謂善人者矣享  
年七十有一初娶劉氏繼彭氏子二人長某兵亂被俘  
不知所鄉次建平也溫厚謙謹類其父豈天所以報施  
善人者耶銘曰

一世之人為善幾何為之自我有弗至耶彼弗為者自  
淪泥汙嗚呼吾幼善則既多百歲之後高墳峩峩鄉人  
銘之永終不磨

吳處士墓誌銘

永樂丁酉某月某日南昌處士吳孔昭卒其孤頴領預  
頻卜明年某月某日葬其邑南山之原先事遣預之子  
某奉刑部主事劉金節所述事狀走京師介翰林庶吉  
士黃瓚求余為銘按狀處士諱嗣麟孔昭其字也其先

有諱誦義者始自番禺來徙而後益盛誦義六世至茂翁茂翁子存拙為新建縣學教諭處士之祖也父本立母張氏處士自幼喪父母教養於其祖其天資端重聰敏讀書日強記數千言稍長而記覽益富為祖所愛恒慟不及事父母事其祖尤篤孝敬有盜入室繫其祖索貨財不得將加害之處士哀叩乞以身代寇怒刃之流血滂然而容色不變寇驚異併舍其祖而去祖卒哀毀不勝而葬祭一以禮嘗同從父本謙長繇役里中屬有

令下長里者驗民無常產者遣出戍既遣而有不樂戍者後誣本謙為己親告牒取代戍本謙時已卒其子當往初未嘗誣及處士也而處士忿曰當遣民戍時我實同之柰何獨誣叔而貽禍其子乎毅然白其事於官竟直之待弟孔拒盡友愛孔拒死撫其遺孤尤厚從弟孔性闔家病疫莫或過問者獨處士日數過饋藥餌病已乃罷於族姍有匱乏及喪不能舉者皆賙之治家教子一本於倫誼間居手不釋卷與人交始終一致所居有

竹數百挺名竹亭日與賢士君子宴游其間鄉先生傳  
拱辰熊伯機皆與往還熊先生嘗以正德題所居之室  
又為文記之蓋年七十有五而卒娶陳氏子男五穎領  
預碩頰預永樂乙未進士某官碩先處士卒女一嫁李  
伯希孫男十有一人銘曰

孝友好義身之章兮茹澹履潔含幽光兮服蘭與芷游  
相羊兮鬱乎崇丘返茲藏兮述行琢銘後之彰兮

宋東齋墓誌銘



嗚呼前二十年西昌老師宿儒凋喪盡矣獨邑之西城  
有宋東齋袁頴樂梁畦樂三先生者皆教授里中其年  
相若其居相邇其出入相偕其鄉衣冠之會必皆正賓  
位其邑大夫政有所疑必皆見諮決居數歲袁梁兩先  
生相繼沒矣獨宋先生巋然在也其鄉衣冠之所敬禮  
其邑大夫之所諮疑猶繫於宋先生而宋先生尤好賢  
重士如安城劉雲章東昌謝子方兩先生皆經師之巨  
擘來學之宗範其過西昌也皆嘗主宋氏孔子曰觀近

臣以其所為主宋先生豈易得哉而今又沒矣斯豈獨鄉之衣冠及其邑之大夫所戚將他處先生賢者之過是邦皆思宋先生豈易得也宋先生之沒且葬其子刑部檢校琮以海康文學廖潛仲所述事狀屬士奇銘謹叙而銘之叙曰先生諱禮字學聞一字伯循宋之先居常州江陰後徙臨江之新喻至邦傑又徙廬陵燦下世業儒術邦傑四世至敬仲又徙居泰和之登科里子應徵宋大理司正司正生叙平先生曾祖也祖仁遠考日

新皆蓄厚德先生自幼聰敏母曾氏始教以孝經小學  
輒能成誦稍長好讀書有志卓立成童喪其考妣葬祭  
能不違於禮撫育二穉弟盡友愛時丁元季之亂挈家  
避兵禍趨山谷中季弟文濟失足墜崖下碎首血霽然  
流幾絕先生冒險赴救裂衣裹負而走久乃甦國朝既  
平定天下先生亦壯日勵志問學受詩於雲章先生會  
有詔下郡縣立社學縣令丞請為社學師篤於訓導作  
東齋於秀漢之上講授之暇藏脩其中是時鄉先生海

桑陳公竹亭王公及其弟崇慶太守愚寄廖公國錄蕭  
公尚皆無恙先生數延致觴詠齋中于然樂也先生  
天資剛果是是非非不為容悅不揚己以掩人有匱乏  
者輒賙之娶劉氏生女一人無子以文濟子為嗣即琮  
也甚鍾愛嘗曰愛子不教之學不可謂愛教而不授之  
經不可謂學然經必得明師遂遣從學海桑陳先生海  
桑先生卒又遣從謝先生琮竟以易經領薦會試禮部  
第一賜進士出身歷官監察御史給事中皆以能稱得

以祿就家養親為先生榮然其初授御史先生為詩五十韻勉之清忠勤慎既而累累詩勉之臨沒又為長詩誠之可為篤乎愛子者也女適曾子沂孫男三蒙謙旅女一曾孫女一先生贍詞章嗜草書閒暇吟詠以自適自號歪吟翁所著有東齋集艮安別墅集藏于家其卒以永樂丙申五月丙午壽八十有五以卒之歲某月某日葬邑某鄉某原銘曰

以學植身爰暨嗣人蓄焉弗施其嗣發之既壽考終以

復於是無替引之永昌來裔

故武畧將軍吉安守禦副千戶王君墓誌銘

吉安守禦千戶王業以工部侍郎周公所狀其考君事  
行求著墓銘余家吉之泰和業祖母實泰和人其考之  
甫甌也延余舅氏陳孔立先生教之家塾余嘗造塾中  
愛其考岐嶷不凡知其必將有立蓋舅氏亦然余之鑒  
也及余出仕往往聞郡人道其行事為之喜及聞其卒  
又為之悼歎故於銘不辭按狀其考君諱成字仁美王

氏世居高郵之興化初諱國安者生諱祥元季祥從軍  
淝西國朝兵初下臨安祥率先歸附授仁和衛千戶屬  
中山武寧王麾下從定中原還調守禦衢州洪武丙辰  
調守禦吉安子斌襲職嘗假守廣東之長樂討東莞山  
寇力戰敗之其配泰和義山蕭氏宦族賢而敦禮實生  
君自幼秀朗閨敏九歲喪父其母教之於內能專意以  
聽外則從陳先生授讀講說日擴其聰明陳先生去復  
從謝子方先生於郡學蓋見聞益廣趣向益端矣時雖

久襲職年十五始理公務而端重謹恪發言處事屹然  
類老成人僚屬不敢忽也公暇披閱載籍涉知其大旨  
慕俎豆之事郡行鄉飲請於太守願得躬效執事守為  
設觀禮一位於側以處之歲壬午吉山谷窮民素為富  
家所困者有司不能戢無所訴告則相率火富民之廬  
以快忿焉有司遂以作亂上聞三司即建議發兵討之  
和者森立君力言此不過愚民復私怨有司遣人持牒  
召至庭下明其枉直懲之而已發兵即各圖功利而濫



及無辜矣議未決朝命下三司止發兵惟執其首謀者  
罪之餘悉不問蓋如君之意永樂初朝廷嚴屯田之令  
計所入多寡行賞罰君奉都司檄專督之廉公而勤教  
率有方軍士咸奮連歲以贏受賚後建北京率軍士採  
宮殿材於衡湘善撫綏均勞逸而事蚤集平居事親孝  
處族嫻有恩能矜恤無告蓋寒餒死喪賴其濟者亦多  
喜從賢士大夫游以聞善道精武事方志於遠大未已  
也而春秋三十有四遽卒衆咸惜之生於洪武丙寅正

月十日卒於永樂己亥十一月十九日葬廬陵城北大塘之原元配胡繼李咸克內助子男二長曰業次曰通女四臧安百戶麻斌蕭本茂羅勉暹其壻也孫男四昭曜某某女三業既襲職正統初以討安樂鄉寇功陞武德將軍吉安守禦正千戶可為有子亦繇其考君所存之厚之所及歟銘曰

世有乘一障守一隅憐厥德善肆逞毒威僨覆隨之曾不幾時嗟嗟王氏作善有源肇祖歷考暨其子孫咸奮

于庸式大其門式用作銘俾刻于墳俾其後昆益勵于仁

張宗武合葬墓誌銘


永樂廿一年元氏縣主簿華亭張君以疾致其事歸歸之又四年為宣德二年三月初十日終於家春秋六十有九合葬余山其元配章氏之墓其孤某奉右春坊庶子沈君所狀事行介庶子君求文刻墓石張之先世見前江西儒學提舉楊維禎先生所著通波阡表蓋出宋

商英之後始來居杭君之八世祖某游松江樂其風土  
遂擇勝于千山之櫻珠灣買田築室居焉六世祖千一  
居士又徙居鳳凰山之祥澤匯千一曾孫諱俊君曾祖  
也祖諱瑤號後山居士務善好施鄉人有佛子之號考  
諱麒字國祥號靜鑑居士善行行如其父而靜鑑以上  
數世咸享高年母某氏君諱桓字宗武資稟敦厚自少  
不尚華靡服用儉約治家事有條緒秩然孝友有誠母  
嘗病劇醫不能措手焚香籲天潛割股煮粥以進母食

之愈事兄宗文盡恭愛公私之務皆身任之不以煩兄  
敦睦宗族敬父之執始終一致延禮師儒相與講學不  
倦志存濟物有司嘗驗產推長萬石區歲董輸賦民貧  
不能輸者率代之輸而不責償饑歲恒出穀貸匱乏久  
不能償者率歸其券平素濟人之急如不及葺鄉校及  
祀典祠又作義井石梁渡舟用便行路求醫方製善藥  
用濟疾疫率以為當然兼志釋典施經延納方外之流  
靡有虛日於為善若渴饑於飲食洪武中以稅戶徵至

當除官援例辭永樂壬辰復徵至除元氏縣主簿授將仕郎公直廉勤得其民心一日進賀箋京師行次沙河水暴漲覆舟舟中人皆溺君漂流四十餘里恍若有人舉之者及其僕馬皆獲濟人以為好善之應既謝官歸益廣濟利之施他無所營疾且革顧其子若孫曰仁義忠信人道之本亦不及他事配章氏繼趙氏子男二疇娶陸氏陳娶顧氏女一歸沈懋孫男六疇畦畷畹畝曾孫男一繆女二銘曰

翹張累葉履仁厚繇高暨元咸耄壽逮宗武君隆孝友  
振窮賑匱恐或後厥施孔博譽孔茂暨佐邑理恪慎守  
翩然辭榮返林藪猗嗟善仁時鮮偶勒銘其藏昭永久



東里續集卷三十五



欽定四庫全書

集部

東里續集卷三十六

詳校官檢討

臣羅國俊

中書

臣劉源溥覆勘

總校官進士

臣楊懋珩

校對官中書

臣范鏊

謄錄舉人

臣朱錫彤

欽定四庫全書

東里續集卷三十六

明 楊士奇 撰

墓誌銘

故奉議大夫衛府左長史金君墓誌銘

太宗文皇帝臨御之初三衢諸生金寔首上書陳王道其綱有二曰君德曰民政君德之目五躬行仁義虛己納諫明察善斷審於用人恭儉節用民政之目五厚風化尚廉恥省刑法薄賦稅愛民力皆嘉納之復試策二

道條對稱旨命於文淵閣光祿日給食與修太祖皇帝  
實錄書奏除翰林院典簿授迪功佐郎賜白金文綺修  
永樂大典陞修職佐郎仁宗皇帝在春宮初開經筵選  
翰林春坊之明經術者更番入講金君與焉本諸實理  
敷說詳明裨益蓋多陞左春坊司直郎授承務郎每進  
論治道必援引經傳多見采納屢承手札之褒兼任稽  
古纂述之事陞儒林郎奉命授衛王經洪熙中陞衛府  
左長史是時上篤意諸子學問簡宮臣十數人為之輔

其文學之嫺操存之正金君其首也金君既感恩遇又重衛王純厚喜學於解析經史開諭義理孳孳盡誠至於王之服食起處率進善言王皆欣然從之而敬禮愈厚凡王府政務不問大小一總於長史金君從容裁處條理井井而率歸於厚自僚屬下至軍校咸服其德王有疾醫藥久不效金君憂形於色王薨金君傷其賢弗壽也哭之過慟以是鬱抑致疾王既葬將引老疾奏乞致事會有旨命同考禮部會試竣事學士故相知者議

欲奏留之翰林而君先得請休致矣未行疾益加竟卒  
正統四年五月廿日也金氏世衢之開化儒家曾祖振  
之祖伯圓考德厚洪熙中贈王府長史妣蘇氏贈宜人  
金君字用誠其諱寔也自幼穎敏強記問為從父博士  
王鉉所期望從學鄉先生何原銘張一民兩先生覽所  
習業尤重之獎勵彌至數年縣令夏景高敦勸上京師  
既入翰林聲譽日出而公退閉戶書帙自娛非公事不  
見達官未嘗以私干人內方直而外恭遜雖心嫉憚佞

未嘗出口小人有不悅之極力擠之者受而不校隆孝友之行處宗戚鄉鄙懽然遇其有過亦必規之凡所交處有急必周之有死於客外或殯或歸其櫬咸致力焉尚澹素非朝謁不采服為文章豐腴雅則有文集若干卷雖老其進學日有程不間博究經史旁通陰陽星厯醫藥之書至佛老之說亦辨其所背於吾儒者指示來學晚號其齋居曰覺非以自儆不妄與人往還知己者過之觴詠娛樂竟日忘倦將屬續卿大夫有問之者曰

死生晝夜常理實無所遺恨惟諸公勉自愛為生民福耳蓋春秋六十有九配汪氏封宜人子男三孟讓仲統鄉貢士季紘女二孫男十二統侍父北京十數年父卒將奉櫬歸葬于鄉謁余為銘余與金君嘗同寮翰林春坊相知也義不可辭銘曰

粵漢西京臣誼仲舒陳策佐藩長沙江都天之生賢何世則無猗歟金君其今通儒始登承明終輔藩國賈才董正用烜厥績更歷四朝請老休逸帝命既俞遽殞於

疾君子之亡凡世所嗟儒苑損輝文林虧華姑蔑之墟  
丘墳我發潛垂永非斯文耶

故少師工部尚書兼謹身殿大學士贈特進光  
祿大夫左柱國太師謚文敏楊公墓誌銘

正統五年二月十八日少師工部尚書兼謹身殿大學  
士建安楊公奉勅歸展先墓既畢事卜日啓行病作衆  
曰曷俟少間公曰君命不敢稽也挾醫以行至臨安武  
林驛疾加遂不起是年七月二十也守臣治棺斂既馳



奏皇上嗟悼輟視朝一日贈特進光祿大夫左柱國太師謚文敏遣禮部尚書胡濙蒞祭遣中使護喪還葬其鄉命有司治墳公先世見余譔其大父墓碑曾大父伯遜大父達鄉父伯成皆贈榮祿大夫少傅工部尚書兼謹身殿大學士曾大母黃大母謝繼阮母劉皆贈夫人公初名子榮字勉仁自學諸生鄉試選第一會試第三廷對擢第二甲賜進士出身入翰林為編修太宗皇帝入正大統更其名榮初建內閣簡翰林之臣七人其中

專典密務七人者解縉胡廣王淮胡儼金幼孜公及士  
奇也公齒最少最警敏一日晚上出右順門召內閣諸  
臣獨公一人在出江西三司奏章示之言吉安鄉民之  
嘯聚者已悉復業蓋朝廷初有聞即遣行人許子謨齎  
勅撫諭子謨行將一月又遣都督韓觀率兵繼之如撫  
諭不下即加兵及是奏至上諭公曰觀不至不下其降  
勅褒觀公讀奏訖對曰計發奏之日觀尚在中道未足  
褒從之自是益重公時四方之事方殷七人者旦夕侍

左右承顧問受旨退治職務且兼稽古纂述之事不虛  
寸晷上時步至閣中親閱其勞且視其所治咸稱旨時  
公尤勤勵遂皆進官公進修撰數月復進侍講明年改  
元永樂秋公請告歸省又明年春七人皆賜二品金織  
衣且勞之曰天下事咸朕與若等同計非若六卿之分  
理也無幾簡翰林之臣十數人兼春坊官任輔導公兼  
右春坊諭德授奉訓大夫日分直進講經史四年春公  
得寒疾命中官以御醫來視賜藥物五年奉命往甘肅

同總兵議邊務察視守備還奏稱旨六年夏喪父給傳  
歸既葬遂命起復是年冬喪母公奏歸守制時已下詔  
巡守北京不許七年春內閣胡公及公金公奉命扈從  
北京甘肅總兵何福奏降人托克托布合等率部來歸命  
公往同福處置還奏上悅遂奉命持節往額齊納之地  
封福為寧遠侯八年春車駕北征布尼雅錫哩公三人仍  
扈從至驢駒河命公先齎勅還報皇太子復還北京冬  
扈從還南京九年春奏奔母喪遣中使護送既還皇太

子命公侍諸皇孫學且命公曰嚴則有成公盡心不怠  
重脩高皇帝實錄命胡廣胡儼黃淮及公為總裁十年  
二月賜誥命并追贈父母妻冬甘肅守帥西寧侯宋琥  
奏叛寇婁達袞逃居齊勤蒙古衛將為邊患時豐城侯  
李彬鎮陝西遂勅彬率師勦之且命公往與彬計度十  
二月還奏餉道險阻今沍寒人疲馬瘠不可行且小醜  
不足以煩王師遂勅彬旋師無幾叛者復歸十一年春  
從守北京十二年三月從征衛拉特時皇長孫侍行上命

胡金及公三人凡行營有暇即與講析理義開其聰明  
尚寶司官闕命公兼之既還勅翰林脩性理五經四書  
大全公三人皆為總裁十四年陞翰林學士仍兼庶子  
扈從南歸十五年春復扈從巡北京十六年夏進高廟  
實錄賜宴賚胡公沒公掌翰林院事益見親密一時廷  
臣狎恩多縱忌公抗直發其私適太學闕祭酒衆共舉  
公實欲疎之上不聽公遂密言十弊指斥五府六部都  
察院章留中不下十七年進文淵閣大學士仍兼翰林

學士授奉政大夫十八年扈從北征秋還京冬將西征親藩奏建文中江西所聚集民兵可徵用出奏示公公對云陛下命復民業二十年矣今復徵非信上曰朕意固如此遂寢三殿災公偕金公陳便宜十數事皆見施行重賢愛民或陷非辜必援之尚書夏原吉以兵饟不給坐繫呂震言其柔姦侍讀李時勉嘗論事亦有言其賣直者皆激上怒公悉委曲為之辨解二十一年秋復扈從西征駐蹕萬全一切軍務悉付公掌寧陽侯陳懋

奏番王也先士千來歸命公往議定降歸奏稱旨廿二年復從北征中道軍餉不繼上聞之命公與金公總計其數遂如二公言遣使招諭釋其弗臣之罪下令班師浙江三司奏處州之麗水福建之政和山寇劫掠請勅兩都司合兵討之公言愚民為有司所苦出不得已兵出則良民先被害願遣一勅使撫諭之不足煩兵上從之卒如公言無事一日上從容坐帳殿諭公二人曰東宮監國久熟政務此歸悉付以天下事吾惟優游莫年



二公共對曰皇太子孝友仁厚天下屬心允稱陛下付託上悅師次榆林川上不豫既上賓凡沐浴襲奠飯含棺歛一切之禮悉出二公衆遂推公先馳歸報既至同尚書蹇公等議喪禮遂議即位禮仁宗皇帝嗣位進公太常寺卿授嘉議大夫仍兼兩職學士逾月進太子少傅授資善大夫兼謹身殿大學士山陵事殷太監孟繼極言公盡心喪事上嘉歎即陞公工部尚書仍兼前二職賜勅褒諭三俸俱支尚書一俸全給米洪熙元年賜

誥贈二代考妣無幾上命範白金為方寸印四枚其文  
曰繩愆糾繆以賜師傅公與金公同受其一皆期之直  
言匡輔脩文皇帝實錄公預總裁仁廟上賓時皇太子  
監國南京遺詔召嗣位公往迎於德州既還命公同有  
司相陵地宣宗皇帝嗣位脩仁廟實錄仍預總裁高煦  
反在廷多懷二心惟文臣三四人勸上親征公其首也  
遂扈從討平之師還特授駢蕃之賜馬騏驎變交趾黎  
利聚眾抗王師總帥孱弱不支輒與利和且為利請立

陳氏後遂以師還奏至上以示文武大臣皆勸發兵擊利上不聽竟偃兵息民公預力焉是年八月車駕巡邊至遵化聞敵逼塞下以道隘師難並進上率鐵騎數千先馳擊之文臣獨公從既還陞少傅進榮祿大夫仍兼尚書大學士三俸俱支辭大學士俸進兩朝實錄賜宴賚又範白金為圖書刻方直剛正四字以賜公數月上念先朝老臣蹇義等四人皆春秋高並賜勅褒諭命輟職務朝夕左右侍論議公預焉賜玉帶加有御製詩畫

之賜公滿三載吏部以聞賜勅有忠言讜論裨益為多  
之褒賜宴禮部遂賜少傅誥進封三代後兩扈從巡邊  
皆至洗馬林而還宣廟上賓公復偕有司相陵地皇上  
嗣位公與同官三人協志合力以効裨益賜賚特厚脩  
宣廟實錄皆為總裁書成進公光祿大夫柱國少師兼  
尚書大學士如故賜玉帶時上日勤聖學命公同知經  
筵事五年謁告省墓賜勅褒諭加厚賚給傳遣中官護  
送既還京道薨春秋七十公仕於朝四十年皆居清密

考鄉試者一讀廷試卷九為人閨疏果毅遇事當為奮  
前不疑於論古人必欲出新見不肯苟同議辟率歸寬  
恕勤職事盛寒暑及小疾未嘗少怠於四裔及邊徼事  
及邊將勇怯智愚靡不通知故忖量事勢率豫中內篤  
孝友睦婣之行家故豐裕且有厚祿能濟窮恤患無間  
疎戚喜賓客善交際雖貴盛無厓岸貴賤小大皆歸心  
焉故聞其沒也咸有嗟咨悼惜之意所著文章有默菴  
集雲山小葉靜軒葉退思集北征記訓子編藏于家元

配劉贈夫人繼劉封夫人皆里處士仲穆之女子男六  
恭讓錫賜貴芳貴通女七兵部主事雷潛詹鎮陳順德  
蘇潤其壻也餘在室孫男十二奏儼倫俊儉佶儼佐倬  
偉伸儀女七曾孫女二皆在室士奇與公同寮三十有  
九年同事四聖今內閣舊臣惟吾兩人未能退公又溘  
先余逝公之葬其子屬少保楊公書墓上之石余銘諸  
幽嗚呼凡今能文士大夫感公之德述公之行雖有之  
矣若交之久知之深言之信者余兩人其庶幾可無愧

也銘曰

桓桓文敏通才博識遭際聖明光奮于績承明延閣著作之庭以翺以翔舒華振英北裔西陲從狩萬里職典者文亦兼知武羌人胸臆帥垣弱彊重瞳屢顧敷奏惟明晚陟三孤貳公弘化恪恭朝夕敢或遑暇帝懷敷仁鞠躬承之民懷被福龜勉成之志存寬惠行在果斷嘉謀讜議褒書有煥予告南旋曾幾何時上下延佇而訃奄來越昔內閣七人同事往苒三紀我銘其四公壽考

終哀榮寵光於乎文敏歿也不忘

從子之宜墓誌銘

之宜名相余從兄思貽甫冢子也母康氏相幼聰慧六歲其父口授小學能成誦不忘九歲日讀四書五經萬餘言旦出從外傳莫歸其父親教督之端靜不好弄群兒百方戲于前未嘗動意也十三部使者行縣聞其名召試之深見賞異舉充郡學弟子員十五郡太守舉應江西鄉試中前列明年會試禮部中副榜當授教官思



貽奏言臣之子年與學皆未可以為人師幸俾臣以歸教之曾益其未至庶他日不辱陛下任使太祖皇帝可其奏既歸益勤於學後充太學生太學生常數千人季試相屢占第一永樂二年會試天下貢士以相為首廷對第二甲一名蓋元延祐乙卯初行科舉思貽甫之曾祖賢可先生即登進士第有傳在國史我國家混一天下洪武辛亥初行科舉思貽甫之從父子淵先生即擢進士第二甲一名建今皇上龍飛初榜相所擢中名數

同子淵先生人皆以為相庶幾不辱其先也相釋褐為翰林庶吉士上篤意儒術作興斯文簡曾榮及相廿八人者日就文淵閣大官給膳使盡讀禁中書賜居崇禮坊月給祿米又給膏火之費使以夜繼晝充其學期追迹於古人相素知自重又祇體德意夙夜刻厲蓋駸駸有進矣永樂十年授刑部浙江清吏司主事是年九月廿五日卒年三十有四娶曾氏繼廖氏子男二奕與女一許嫁陳考嗚呼相孝於父母友於弟妹與人交必輔

之善道族姍閭巷有急輒赴之篤好畜書在太學三年  
購積千餘卷既登第一夕盡於火哭之慟後悉貲重購  
之浸加於舊矣手一卷雖疾病寒暑不暫釋其志可見  
其才與其所學以試之宜有可稱而其不得年也固相  
之命乎嗚呼始思貽甫幼孤遭喪亂貧苦子子自力獨  
念先世詩書之業荒墜弗振懍懍焉圖維繼之務諸其  
身以待其後人壯而生相殆可望矣相壯又遽卒此亦  
獨相之命哉相卒時父母皆老矣始三歲與一歲女甫

亂也踰月其弟鵠自京師歸其喪及其妻子明年月日  
其父葬之邑千秋鄉盤古山之原余其從諸父也尤哀  
之為之誌云

蕭榮忠墓誌銘

榮忠諱原壽姓蕭氏祖某父某世居泰和城西榮忠和  
厚事親克供子職治家能謹尊卑外內之分負材具元  
季四方兵擾諸郡邑各團結為保固時泰和州監擢榮  
忠為義士授民兵若干俾捍廬陵東固之寇寇迄榮忠

去不踰境猶不忍貧窮凍餒之民遇輒賑之饑歲人賴以全活不可勝算皇明既定天下慨然曰吾得復為太平幸民豈當常碌碌不已耶即謝去廛市尋山水之樂行尋邑東南一舍許沂仙槎江上桃源至于紫江之側徘徊樂之相土建宅環山帶水而奇葩茂樹旁輝上蔭又買園田廣樹畜以資祭祀賓客伏臘之費作塾館歲禮致明師以誨其子若孫及其鄉人之子弟聞前國子學錄蕭執先生教鄉校遣子本從之游先生卒又遣從

游鄉先生蕭尚仁之門且戒之曰豈望汝讀書取青紫  
耶不學則無以明善植身而凡一切公私之務悉委家  
子保晚節頽然惟日會賓聚朋飲酒譚謔酒酣起舞蹁  
躑作嗚嗚歌漠如不知有人間富貴憂患事者歲庚辰  
九月某日寢疾而卒享年六十有八娶羅氏子男三長  
保次楚先卒次本今為邑學弟子員女三孫男九保等  
將以是年十二月十二葬其里里烏先之原先事本具  
書來請銘余與本交十餘歲知慕榮忠亦十餘歲矣去

歲始獲見於其家時已病聞余來大喜遽起降階肅余  
升坐余賓位觴余曰吾慕子久矣幾不及識子豈不為  
恨耶後余再往見之竟病革不及言嗚呼惜哉乃敘次  
其事為銘銘曰

孰存弗陂獨夷夷兮孰為弗勤獨嬉嬉兮蹈善施義以  
為基兮庸以昌大其本支兮又百斯世孰之與葵兮

故登州府學教授郭先生墓誌銘

登州府儒學教授泰和郭先生年七十有七援例得解

去將去諸生閉學舍拜乞留留三月寢疾而卒某年月  
日也明年春正月從子彰始克走五千里啟殯奉柩歸  
其年十有二月二十四日葬千秋鄉楓樹湖宵箕阡先  
生諱約字敬守其先岳之臨湘人五世祖匯宋季舉進  
士授袁州司戶後棄官來泰和遂為泰和人祖善升父  
文輝母蕭氏先生自幼端重不肯逐群兒狎嬉嗜讀書  
不懈晨夜稍長從鄉先生王方剛學尚書經又從前進  
士寧國尹戴邁先生學益大進當元科盛時三就試有



司皆不偶先生曰第學未至耳學至能免我哉未幾兵  
興科廢先生齒益壯知益明遂撤去科舉業更從鄉名  
儒康匡山及余伯祖主簿公兄弟肆力古文辭聲譽益  
起國家混一區宇求賢興治洪武四年舉明經授應天  
府都稅司副使居再歲有能聲賜勅命及朝服羅衣高  
麗進布明年陞武岡稅課司大使時進士毗陵徐伯凝  
守武岡遇先生禮甚恭日請教授郡諸生後選高科而  
升者多先生之徒二年遷瓜州批驗茶引大使三年詔

中外舉流外官文行兼優者教府縣學揚州府判胡乾祐以先生應詔既至試文淵閣中上等除漢陽縣學教諭漢陽學舊無明經師諸生不知所業先生至開道誘厲三年有選進士去者繇是漢陽科不乏人滿三考書最陞教授登州府學施教一如漢陽時故登州作興一旦出並海諸郡右在登州七年卒郡長貳以下以素服臨哭武將及市里之人皆嗟咨悼慟咸來會葬蓋先生接人無賤貴少長必誠必盡故人皆敬愛樂就之在官

三十年無纖芥過舉雖錢穀鼓勝或甚寒暑一卷不斲  
去手急人之窮常如不及遇人有不善極口詆不少貸  
所著文有淮南集二十卷湖南集若干卷東原集若干  
卷鄉先生陳心吾稱其雅馴而不陳發舒而不激為典  
刑老成廖先生子謙稱為有德者之言娶吳氏繼李氏  
何氏子男一人獻生二十年卒常命從兄慶宗次子彰  
為嗣後慶宗失長子又命彰歸承其父而取彰次子純  
後獻至是純以彰之命齋先生從子泰和縣學訓導鼎

所狀行屬余為辭銘墓先生嘗逮事余曾大父待制公  
又從游先大父兄弟而交先父最厚余嘗三年侍教先  
生漢陽先生教愛之如子今不復可親矣嗚呼尚忍為  
辭銘先生哉然義不敢不銘是以掩涕叙次為銘銘曰  
德之厚祿以久祿雖庠尊以師雖尊弗顯其傳則遠楓  
湖之岡玉歸于藏有熒其光千載弗忘

衛府右長史楊君墓誌銘

衛府右長史楊君民服卒士君子相知者聞之始駭而

疑既審而悲咸臨而慟曰不見幾日而遽為千古耶民服豈當止此耶天之理為善者壽子之命不係常理耶苟命皆然孰其勉於善耶是時民服父母妻子皆在故鄉六七千里外惟一養子在側及其僚與素往還者之助治棺斂備既歸葬於鄉其父季琛先生哀之不忍泯之也屬余為銘民服諱黻自幼端厚寡言笑喜學問十數歲已能力探默識其後稍出為文鄉先生周仲方覽之喜曰楊氏千里駒也尤為學士解公所獎重永樂甲

申侍父官東平舉中山東鄉試明年中禮部會試廷試  
賜進士出身踰年擢四川道監察御史授承事郎練達  
如素習臨事揆理務當於公聽訟折兩造之辭人無冤  
者而扶正抑邪其志行焉陞文林郎仁廟臨御下詔求  
言即上疏論敬天勤民崇儉戒奢等十餘事多見采納  
遂擢衛王府右長史階奉議大夫日以詩書進諭於王  
而隨事開益皆由於正甚見禮遇於裁處庶務粲然條  
理蓋自寮屬以下咸服其德能屬陪祀南郊民服素羸

弱且病初起沐浴宿於公將祭又沐浴夙興就位冒寒甚祭畢退疾作遽卒宣德元年正月某日也民服孝友誠至母嘗久病憂形於色不解帶晝夜侍左右者四十餘日友愛弟妹惟其所欲不忍一毫傷其意待人以恕居家處鄉里及在官理政一不見疾言厲色而嚴於自守未嘗以空匱苟於義外取一芥至賑貧賙急恒恐後己有無不計也與人處恂恂如不能言若商論往事是非人賢否得失經傳疑義語娓娓不窮而皆精實有據

其學於經熟書詩春秋旁究子史百氏為文章才識兼  
茂性淡泊無他嗜好獨好載籍購積日富不可購致者  
必借錄進學之志始終不懈卒年四十有九楊氏吉水  
忠節家其曾大父伯允先生一時偉人見余所作墓誌  
大父廷章隱居教授季琛先生用文行舉歷仕州縣四  
十年所至有古循吏風今以衛府長史致仕母宋氏淦  
洪洞里名家封宜人民服卒宜人晝夜哭曰老乃失孝  
子歲餘亦卒民服娶李氏封宜人子男三讚詠談女三



長先卒次嫁德清縣學教諭周仁本次未行民服於余同宗在京師往還相好素愛余文閒暇晤語未嘗不及文事嗚呼已矣而余所論述民服可以無愧色矣銘曰為仁與義惟日不足溫其如玉嗚呼民服

吳教諭墓誌銘

永樂十三年梓潼縣學教諭泰和吳寧存淵丁母憂歸明年二月三日以疾卒於家其二子將以是年某月某日葬其邑某鄉某原先事以鄉貢進士曾鶴齡所狀世

次行誼請銘吳之先居廬陵郡中宋紹聖間諱公萬者  
以營兵守泰和西平塞遂家焉至太學生李平始以儒  
顯五世至叔啟叔啟孫仲珪與安成劉雲章先生相好  
存淵之父也存淵為人淳質和易髫髻時聞其父與雲  
章先生講論倡和已知好學十歲父沒隨其母辟兵亂  
走山谷書冊不暫去手亂定益篤志自勵聞永豐唐裴  
先生以詩書典教萬安縣學從受業焉泰和典教者遂  
舉充弟子員洪武癸酉中江西鄉試第六名明年會試

下第為太學生為祭酒吳啟所重尋奉命督治陂塘湖廣之黃陂縣還賜襲衣楮幣丁丑除保寧府梓潼縣學教諭梓潼前此未有學官縣常遣郵長署學事諸生不知自勵廩食罷脫巾條短服挾弓矢從里少年馳騁弋獵日以為常存淵至始立教條課諸生諸生始去舊習知務於學又奉府檄攝廣源縣學教諸生如梓潼永樂丙戌召脩永樂大典書成賜楮幣還職蓋卒時年五十有九存淵居家有孝悌之行與人交必誠必盡急義如

饑渴人有負之者未嘗較也娶陳氏處士守道之女二子舉善止善皆有立矣銘曰

澄江之南五十里曰三顧山蕭清節書臺在焉存淵居處講學其下其所興起於善有由矣而既拜梓潼之命過家省母適有芝駢產於其廬非其誠於中施於外何以致斯吳氏之後世永篤念之庶幾不墮

故通議大夫湖廣按察使羅君墓誌銘

正統四年九月十四日湖廣按察使羅銓文衡卒於官

其兄文振銜哀茹苦自淮安走武昌歸其喪及其孤訃至北京翰林修撰邵宏譽述其事行索余為銘邵其御史時同寮余其會試時考官皆素厚也既諾之至是文振將以其卒之明年某月某日葬之山陽清江浦其考妣之墓之側遣人來趣銘羅之先家撫之宜黃元初有仕為吉水州學錄者遂家州之東坊學錄孫再可再可孫繼道繼道子景泰少游江淮遂居山陽娶范氏生二子文振文衡也文衡自幼敦茂不好狎嗜書冊不去手

稍長充邑學生旦夕克勤所造詣日出同輩右永樂辛  
丑登進士第宣德丙午擢廣西道監察御史無幾丁內  
艱歸杜門謹禮謝絕賓客服闋改廣東道時風紀頽弛  
朝廷陞通政使太康顧公為都御史奉勅選留賢俊罷  
黜不肖臺憲一新顧獨數數稱文衡之才且良曰御史  
不足久淹之也文衡襟宇闡爽而靜專厚重明於理勤  
於事慎於法審於情雖末務必求至當同輩有室未通  
者咸就質之都御史有疑未決者咸召咨之凡各道擬

奏刑獄率經文衡閱牘乃進一為盡心而未嘗有矜色  
廣東民墾兵後荒田厚穫境內屯卒欲斂之不得而忿  
結衆夜竊所獲民覺起逐之卒棄走其三人失道溺死  
按察司論民三人抵死獄上文衡言於顧公律竊盜棄  
財走主追殺者免罪矧溺乎公從之民皆不死常州姦  
民告富家謀作亂所連甚衆奉命往按之皆妄遂抵告  
者罪其明治獄多類此於事干禮法者不肯默默刑部  
郎有私忿相詬聲徹堂上堂上官不能制文衡曰是可

長乎遂劾奏忿詬者皆降黜堂上官以宥會湖廣闕  
按察使有旨令廷臣舉端重廉能達於大體者遂以命  
文衡公議翕然稱允既至獄有繫囚二千五百久未決  
數日發遣殆盡人皆服剋弊剔蠹不怒而威時民間徵  
調繁夥有司往往舉錯踰制文衡憫其非得已也率從  
輕典惟受賂無所寬假每語其同官曰內執法獄議或  
失中有大理為之平外莫為之平何可以不盡心景陵  
令楊季安廉正不阿見嫉於州州誣其罪於鎮撫使已



下楊獄文衡為白之復楊官而正州官之造誣者罷之  
都指揮陳震縱私不法奪造御物解宇為私居糾正其  
罪其武臣率挾威厲民前之持憲者異與莫能戢文衡  
一裁以法若武臣者咸誚其嚴卒不為動歲饑近邑流  
民紛集城下躬出撫輯捐俸倡寮屬出米食之濟活彌  
衆倡家乘機買貧民幼女習歌舞稔歲父母倍直求贖  
不得文衡聞之惻焉下令不予贖者罪之凡歸五百餘  
人奏減各郡驛馬千二百匹遞運所夫七百餘人以舒

民力未卒前數日猶力疾草奏言都司官係一道武臣  
儀表不可濫授今都司官犯賊率循例罰役復職武人  
徼幸不知戒儆反為得計作過愈甚乞自今如係軍功  
陞者但犯賊罰役後復其職發守邊總兵帶管操備聽  
調如非軍功係保舉陞者犯賊罰役後降復原職庶幾  
有以警肅下人從之所至處同官如兄弟未嘗有間言  
冰檠之操始終一致春秋四十有七而卒卒之日湖湘  
之人如喪所親中外縉紳君子皆有喪良憲臣之歎元

娶楊氏贈孺人繼室李氏封孺人子男一雲翹女二銘

曰

羅氏之初繇撫來吉官于巽序詩書代述學錄五葉迨  
景泰甫載自吉陽來止淮土植善累仁所被既多二子  
續奮舒英振華起家賢科桓桓者仲履貞執義廉莊簡  
重鷹其冠衣肇跡烏臺正色北面直道不回明法慎罰  
夙夜惟敬欽恤之仁敢怠帝命鞠躬小心厥績彌彰升  
董外憲厥施式宏民有蝨蠹以獮以難民淪彫瘁以衣

以食抑陰扶陽爰建紀綱芒芒荆湘惠流洋洋天之生  
才凡以濟世曷畀之才而年弗畀嗚呼文衡未半百齡  
其不忘者不在茲銘

封翰林編修杜君墓誌銘

翰林侍講杜寧縑經奉宗人經歷童孟韜所述其父編  
修君事狀求銘其葬按杜世居黃巖之澄江其先與宋  
丞相清獻公同宗編修六世祖存矩祕書少監清獻從  
弟也五世祖澥軍器庫使高祖諱茂實元象山書院山

長曾祖諱叔楚慶元路學錄徙天台祖諱順翁考諱舜道皆隱居不仕妣周氏編修諱仲威字希恭幼穎敏讀書一二過成誦不忘性孝友未成童父坐累當詣京師牽父衣悲號願侍行父母不許踞泣曰萬有一大人不免兒能獨安遂行父竟得白奉以歸父歿哀毀事母愈篤備甘旨之養先意承奉得母懽心家嘗遭誣官逮其兄歎曰母老恃兄以安奈何可去耶代兄行誣竟直女兄適士人而家窶以田七十畝貸之畊用賴以裕永樂

初令郡縣覈實荒田蠲其稅縣以屬之躬勤周歷悉究  
其實姦欺不容細民賴焉通制戶百置長里舊籍二長  
歲久戶耗已半而歲役仍舊民不勝力言於上官并一  
長而更其籍民乃不困歲旱令丞徧禱弗應遂躬率耆  
老禱龍湫雨隨注三日歲用豐穫大夫士為詩若文詠  
之紀之縣令康彥文屢欲具薦懇辭乃已為人和厚坦  
夷重義輕利不務儲蓄而急人之急恒如弗及公直不  
私鄉里恃以為平閒暇讀書不倦尤熟於史而篤於教

子家居用禮悉準朱氏不肯循流俗從事浮圖老子用  
子貴封翰林編修文林郎正統六年三月十二日卒春  
秋七十配施氏封安人克相于家子男三長寧登進士  
甲科入翰林累進侍讀才識為士論所重次泰次安女  
二孫男六女三編修君之葬以是年十二月某日墓在  
邑之西山之原銘曰

德稱於宗行施於鄉其才允良而潛弗揚翾翾嗣興聿  
來寵章命秩斯煌奄歸于藏有發幽光逝也不忘

太醫院御醫沈君墓誌銘

仁宗皇帝在東宮二十年太醫惟院判蔣用文最見親  
厚藥非用文製不進一日用文病且殆上親御寶翰遣  
中使即其家問之且問脫不起醫士誰可任者用文書  
沈以潛氏名附中使以進用文卒踰月上即大位擢以  
潛太醫院御醫後數月士奇親聞聖語用文真知人以  
潛真不負用文舉士奇自是始識以潛而與之往還沈  
之先世皆以醫仕宋南渡由汴徙蘇之長洲恩陵嘗書




良惠二字賜其家謂其醫之良有以惠民也至今鄉稱良惠沈氏元為醫學提領諱瑛者以潛高祖也曾祖諱彥才平江路醫學錄祖諱德輝江浙行省醫學提舉考諱綱妣李氏以潛諱玄蚤喪父能自刻勵於學幾冠盡究其先世之傳進而明於素難仲景之書及潔古東垣諸家之旨不執古方每審求病源隨證用藥用之必効有為庸醫所誤而殆者往往求以潛而安而能報與否一不計也一時鄉之老於醫者多服之而求者日接踵

戶外矣郡太守舉醫學正科以母老辭禮部以名醫徵  
至隸太醫院即見重於上官有所疑恒就講論暨擢御  
醫為上所信用屢奉命往視總兵官疾而京師士大夫  
尤多德之宣德壬子秋以潛得疾久未瘥自歎曰命其  
止此又聞其長子死疾益加是年十一月三日卒於北  
京春秋六十有四以潛為人平易質重不為矯激辯巧  
以譁世媚俗工詩好琴閒暇焚香一再鼓自適未嘗求  
知於人故知者亦寡娶滕氏有婦德先十三年卒子男

四寅賓宇宙寅先兩月卒女五長未行次歸王森三尚  
幼孫男五禧祐禎餘未名女二曾孫男女三人賓將奉  
櫬歸其鄉竺山先塋之次卜明年十二月庚申合葬滕  
孺人之墓以治命齋翰林修撰金君問所述事行來求  
銘為之銘曰

醫之克明審覈病源隨宜處方功臻十全彼其昧者執  
方俟病治十斃五哀哉人命嗟以潛甫允醫之明理究  
業精厥効孔微以仁存心以義處物曷不百年恒濟天

折東南其鄉歸藏有墳來世有聞不在斯文



東里續集卷三十六